

**Takornariat umiarsuarnik takornariartaatinik tikittut tulannerminni  
isumannaallisaanikkut akitsuuserneqarnissaannik Naalakkersuisut UKA2024-mi  
Inatsisartunut saqqummiussassamik inatsisiliornissaat pillugu Inatsisartut  
aalajangiiffigisassaattut siunnersuut. Isumannaallisaanikkut akitsuutip siunertaraa  
inupparujussuit umiarsuarujussuarlutik tikittut tulannerminni timmisartukkut  
tikittutuut periuseq malillugu nalunaarsorneqartalernissaat, nunatsinnilu  
aningaasaqarnikkut iluanaarutigineqarsinnaalerlutik.**

*Inatsisartunut ilaasortamit Aqqalu C. Jerimiassenimit, Atassut, saqqummiunneqartoq*

**Aningaasaqarnermut Akileraartarnermullu Ataatsimiititaliap**

**siunnersuutip aappassaaneerneqarneranut**

**ISUMALIUTISSISSIONAA**

Ataatsimiititaliap suliarinninnermini ilaasortarai:

Inatsisartunut ilaasortaq Hans Peter Poulsen, Siumut, siulittaasoq  
Inatsisartunut ilaasortaq Jens Frederik Nielsen, Demokraatit, siulittaasup tullia  
Inatsisartunut ilaasortaq Asii Chemnitz Narup, Inuit Ataqatigiit  
Inatsisartunut ilaasortaq Mariia Simonsen, Inuit Ataqatigiit  
Inatsisartunut ilaasortaq Kuno Fencker, Siumut  
Inatsisartunut ilaasortaq Lars Poulsen, Siumut  
Inatsisartunut ilaasortaq Jens Napaattooq, Naleraq

UPA 2023-mi ulloq 10. maj 2023 siullermeerinninnerup kingorna ataatsimiititaliap sunnersuut misissorpa.

**1. Siunnersuutip imarisaa siunertaalu**

Takornariat umiarsuarnik takornariartaatinik tikittut tulannerminni isumannaallisaanikkut akitsuuserneqarnissaat pillugu inatsisissatut siunnersuummik UPA2024 nallertinnagu saqqumiusseqqullugit Naalakkersuisut peqquneqarnissaat aalajangiiffigisassatut siunnersuutikkut matumuuna siunertarineqarpoq. Siunnersuutip siunertaraa umiarsuarnik takornariartaatsinut ilaallutik takornariat timmisartukkut tikittunut periuseq malillugu nalunaarsorneqartalernissaat. Siunnersuutikkuttaaq siunertarineqarpoq nunatta aningaasaqarneranut iluaqtissiinissaq.

**2. Siunnersuutip Inatsisartunit siullermeerneqarnera**

Siunnersuutikkut siunertarineqartoq siullermeerinninnermi nalinginnaasumik tapserneqarpoq. Takornariaqarnermik suliffissuaqarneq Kalaallit Nunaannut aningaasaqarnikkut iluaqtis-

sarsiffiusariaqartoq siunnersuullu matumani pineqartoq tamatumani periusissat ilagigaat partiinit isumaqatigineqarpoq. Takornariaqarnermik suliassaqarfik suli ineriertortutut isigine-qartariaqartoq aammalu nunatsinnit aningaasaqarnikkut iluaqtaasussanngorlugu ineriertorteqqinnejartariaqartoq, tamatumalu peqatigisaanik takornariat nunami imaatigullu ingerlataat nakkutigineqartariaqartut oqaatigineqarpoq.

Oqaatigineqartutut siunnersuutikkut siunertarineqartoq taperserneqarpoq. Suliniutill Naalakkersuisunit aallartinneqarsimasut aammalu 2023-mi ukiakkut ataatsimiinnermi inatsisissatut siunnersummik Naalakkersuisut saqqummiussinerannik inernejartussatut naatsorsuutigine-qartut innersuussutigalugit siunnersuut itigartinneqartussatut Naalakkersuisunit inassutigine-qarpoq. Taama oqariartuuteqarneq tunngavigalugu siunnersuut ilaatigut tusaatissatut tiguneqarpoq, ilaatigullu kaammattuutigineqarluni takornariaqarneq pillugu nuna tamakkerlugu periusissiassamut nutaassamut siunnersuut ilangunneqassasoq, soorlu tamanna 2023-mi aningaa-sanut inatsimmut atatillugu isumaqatigiissuteqartut Naalakkersuisunut kaammattuutigigaat. Taamaattumillu oqaatigineqartariaqarpoq siunnersuut taama iluseqartoq ataatsimiittarfimmi ikinnerussuteqartunit taamaallaat taperserneqarmat.

Allannguutissatut siunnersummik saqqummiussisoqanngilaq.

### **3. Ataatsimiitaliap siunnersummik suliarinninner**

Suliani allassimasut tunngavigalugit ataatsimiitaliamit maluginiarneqarpoq Naalakkersuisut 2023-mi ukiakkut ataatsimiinnissamut inatsisissatut siunnersummik saqqummiussileraartut. Umiarsuarnulli takornariartaatsinut ilaasunut akitsuutip atuutilerseqqinnejarnissaanik aningaasanut inatsimmut atatillugu isumaqatigiissut Naalakkersuisut innersuussutigigaat ataatsimiitaliamit maluginiarneqarpoq. Kiisalu Naalakkersuisunit paassisutissiissutigineqarpoq suliniutit, ilaatigut kommuninik suleqateqarluni, aallartinneqartut inuussutissarsiornermi aningaasaqarnikkut periusissiamik suliamut aallartinneqartumut aammalu takornariaqarneq pillugu periusissiassamut aggersumut ataqtigiiissaarneqassasut.

Siunnersuuteqartulli matuminnga siunnersuuteqarnermigut siunertai aammalu siunnersummik inersuarmi suliarinninnermi oqaatigineqartut Naalakkersuisunit qanoq malitseqartinniarne-qarnersut ataatsimiitaliamut erseqqinngilaq.

### **Siunnersuutip aningaasaqarnikkut kingunerisassai**

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinnerani aningaasaqarnikkut allaffissornikkullu kingunerisassat siunnersuutip tunngavilersuutaani aallaaserineqassasut. Tamanna naapertorlugu siunnersuutip piviusunngortinnerani aningaasatigut kingunerisassat siunnersummi nalunaarneqartut, taamaallillunilu inatsisissatut siunnersummik suliaqarneq pisortani A/C fuldmægtigip allaffissornermut kiisalu tusarniaanermut inatsisilerinermullu tunngasumik suliaqarnera ukumi iluitsumi sulineranik naleqartussatut naatsorsuutigineqartoq ataatsimiitaliamit maluginiarneqarpoq.

**Ataatsimiititaliap inassuteqaatai**

Ataatsimiititaliaq isumaqatigiittoq allannguutissatut siunnersummik imaattumik saqqummiussivoq:

**Umiarsuarni takornariartaatini ilaasut isumannaallisaanermut akitsuusiivigineqarnissaannik siunnersummi matumani siunertat umiarsuarni takornariartaatini ilaasunut akitsuusiinissamik Naalakkersuisut maanna suliaannut ingerlasumut ilanngunneqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.**

Allannguutissatut siunnersuut akuerineqassasoq aammalu aalajangiiffigisassatut siunnersuut itigartinneqassasoq **ataatsimiititaliap isumaqatigittup** inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

---

Hans Peter Poulsen  
Siulittaasoq

---

Jens Frederik Nielsen  
Siulittaasup tullia

---

Asii Chemnitz Narup

---

Mariia Simonsen

---

Kuno Fencker

---

Lars Poulsen

---

Jens Napaattooq